

## LJUDEVIT GAJ

# HORVATOV SLOGA I SJEDINJENJE

1

Još Horvatska ni propala, dok mi živimo,  
Visoko se bude stala kad ju zbudimo;  
Ak je dugo tvrdo spala, jačja hoće bit,  
Ak je sada vu snu mala, će se prostranit.

2

Većkrat senja čudne senje slatke radosti,  
Kada se joj kažu tenje jake mladosti;  
Drugda pako magle crne nju opstiraju,  
Kada sestre njoj neverne nju zapiraju.

3

Jenput vidi županije sve ponovljene,  
Stare slavne sve banije znova stvorjene;  
Vidi, čuje Gorotance, Krajnce dolazit  
I s Horvati neprestance tako govorit:

4

"Hoj Horvati, braćo mila, čujte našu reč,  
Neće nas razdružiti sila baš nikakva već;  
Nas je negda jedna mati draga rodila,  
S jednim nas je, Bog joj plati, mlekom pojila.

5

Kako ćemo majki bolje sad zahvaliti,  
Kak da bumo jedne volje se sjediniti;  
Jal i nazlob njejne sine su razdružili,  
Stare slavne domovine diku zrušili.

6

Ni li skoro skradnje vreme da nju zvisimo,  
Ter da stranjsko teško breme iz nas bacimo;  
Stari smo i mi Horvati, nismo zabili,  
Da smo vaši pravi brati zlo prebavili."

7

Jenput čuje svoje sine glasno pevati,  
Složne glase u visine tako zdigati:  
"Braća danas kolo vodi, danak svetkuje,  
*Horvatska se preporodi, sin se raduje.*"

8

V kolu jesu vsi Horvati stare države,  
Staroj Slavi verni svati s Like, Krbave,  
Krajnci, Štajer, Gorotanci i Šlavonija,  
Skup Bošnjaci, Istrijanci ter Dalmacija.

9

Vsi Horvati se rukuju i spoznavaju,  
Istinski se sad kušuju, reč si davaju;  
Neka znaju sveta puki njihov novi zvez,  
Hvalit ćeju vnukov vnuki Slavski narod ves.

10

Nudar, braćo, čaše z vinom sad napunite,  
Zdravicu horvatskem sinom vernem napi'te;  
Neka žive naša sloga, vsaki pravi Slav,  
Pravi sinko roda svoga neka bude zdrav!